

勸義文

世人稱孝曰孝心稱忠曰忠心稱義則曰義氣夫義不言心而言氣何也蓋義者有一往堅貞不拔之氣天地賦之於人審能行焉則富貴不能奪貧賤不能移刀鋸刑罰不能動金玉貨利不能搖海枯石爛不能變可以塞乾坤可以光日月大而成聖爲神小而完名全節莫非此義此氣爲之是義氣乃天地間之正氣也然吾見世人亡失者多矣顧家不顧國爲臣之義亡顧妾不顧妻爲夫之義亡顧財產不顧手足爲兄爲弟之義亡顧勢力不顧肝膽爲朋爲友之義亡於是天地間之正氣日消邪氣日長猶之人身元氣衰百邪俱入不死則病良可哀已吾願

道藏輯要

呂帝文集

九

室集五

世人理會義氣兩字譬如人有氣則生無氣則死人而無義雖生猶死也必須食人之祿忠其事受人之託盡其心記人之恩勿使讐報懷人之惠勿使怨酬藉人之培植扶持勿使根本或忘是曰義人一飯之德必酬一飲之惠必報一言相諾始終不渝一身相許患難不避胸中熱心頸上熱血思報有恩是曰義士幼喪怙恃賴人撫養及其成立事若親生生養盡禮死葬盡哀是曰義子一富一貧愈篤交情一貴一賤交情不厭乘車戴笠相逢飲泣騎馬步行相見淚傾是曰義友或屬葭莩或係瓜葛我有餘彼不足周之給之彼有求我必諾許之與之無嫌心無厭意是曰義親衣食於人恩同父母倚靠於人分若君臣勿

以勢力衰而心變勿以門祚薄而他圖無榮無枯竭心竭勿是
曰義僕凡此等人觀其五倫五倫必備觀其百行百行必全是
得天地之正氣而不失一身之元氣者也生斯世也可以完名
全節而逝斯世也何難成聖爲神也哉然吾所言者人也殊不知物亦有之犬之濕草也馬之垂韁也牛之拒虎也猿之攀輿
也獸也何其知義也雀之投印也鴿之傳書也鴨之啣衣也雁
之寄信也禽也何其知義也龜之援溺也鼈之救病也蟻之護
屍也蠅之抱筆也昆蟲也何其知義也紫荊花也連理枝也漠
北青青塚也草木也何其知義也嗚呼由此觀之天地間何物
而無義哉故曰義氣者天地之正氣也當思禽獸昆蟲草木尙
實爲世人恥深爲世人勸耳

道藏輯要

呂帝文集

卷

室集五
三十三